

335/2
LUGANDA
PAPER 2
July/August 2023
2½ hours



WAKISSHA JOINT MOCK EXAMINATIONS

Uganda Certificate of Education

LUGANDA

(Okusoma bwino, eby'obuwangwa ne Litulica)

Olupapula olwokubiri

Essaawa bbiri n'ekitundu.

EBIGOBERERWA:

- Olupapula luno lugabanyizidhwamu ebitundu bisatu, **A, B, ne C**
- Ekitundu **A** ne **B** bya buwaze.
- Kitundu **C**, londamu ebibwazo bisatu okuva mu butabo obw'enjawulo ng'akamu ku bwo ka bitontome.

EKITUNDU A

1. Soma ekitundu ekikuweereddwa n'oluvannyuma oddemu ebibuuzo ku nkomerero yaakyo. *(Obubonero 25)*

Ebya zaavugiddewa mu mikolo gy'okwanjula bisaana bidibizibwe. Nazzikuno ng'omukolo gw'okwanjula gubeera gwa maka abiri, aga Kawasa ne gw'awasa naye owa! kati bitabuse emikolo gyafiuka gya katemba na kweraga. Mwana mulenzi kasita kamutanda n'aleeta ebirabo eby'olusuluugi afuuka kisekererwa ku kyalo, mu mpapula z'amawulire, zitterefaayina zaakuno wamu ne mu bakoddomi be. Awo no oyo kawasa atwala ebingi omwogezi n'alyoka amusuusuuta n'amujajjatta nga bwe yafuna obuuma nga tannayiga na kububala. Enkola y'okulaga emikolo gy'okwanjula ku ntimbe za tterefayina ezaalidde abavubuka ebitukula makaayi by'azaalira ku nsiko anti kati atasobola bya kweraga ebyokwanjula abifuuwe mu nkombe. Era kati buli bw'oyogera ku kwanjula abavubuka bangi kubawunyira zziizi.

Katikkiro wa Buganda, Charles Peter Mayiga azze avumirira enkola eno eyokwejjalabya, azze akubiriza abavubuka okukendeeza ku nsaasaanya basige ensimbi mu bintu ebisobola okwongerera ku nfuna yaabwe; mu kifo ky'okuteeka ensimbi mu bakazannyirizi, abayimbi abajja ku mukolo mu lutemya lw'eriiso ne bakuuliita n'obulindo bw'ensimbi ezandiyambye kawasa ne mukyala we.

Wano mu Buganda omwana omuwala bwe yagendanga e Busoke oba Kiyite okuzza omukono emabega, ng'atuuse okufumbirwa. Ssenga w'omuwala yaweebwanga ekkatala okunoonyeza omuwala omwami beetange obuswavu mu maka. Ssenga bwe yazuulanga omusajja omutuufu asaanira muwala we ng'atandika okusala entotto ssaako n'okuluka olujegere wakati w'amaka g'omuwala n'omulenzi ayagala okuwasa.

Ssenga kimukakatako okulaba nga omulenzi ono asisinkana taata w'omuwala oba muyite mwannyina wa Ssenga. Omulenzi yagendanga n'abantu bana omuli Ssengaawe mwannyina, Jjajjawe, ssaako kkojja amanyi okusengeka ebigambo obulungi era nga y'amwogerera. Mu nsisinkano eno esooka, abantu okuva ku njuyi zombi beeyanjulanga ne beemanya, Omulenzi wano weyabotoleranga ekyama ky'okwagala okuwasa omuwala oyo. Wano nga basinziira ku byogeddwa okulaba oba ddala ababiri bano basobola okufumbiriganwa. Singa kyazuulibwanga mu maka g'omulenzi oba omuwala waliyo endwadde ez'olukonvuba, basezi, bagwa eddalulu, oba amaka gombi geerinako oluganda ekyama kyakomanga awo. Ensisinkano eyokubiri yalinga yakusalawo oba bakkinziganyizza okutwala omukolo mu maaso. Ensisinkano zino zaabanga za kyama era nga singa ekyama kifa nga tewali muntu atabadde mu kyama kino akitegeera okusobozesa omuwala ono okufuna omulenzi omulala n'omulenzi okufuna omuwala omulala.

Naye singa abazadde b'omuwala bakkirizanga okusaba kw'amaka g'omulenzi, ab'enju y'omulenzi baaleetanga ebirabo ebisaamusaamu ng'akasiimo okubakkiriza okwegatta ku maka gaabwe. Ebyo nga biwedde Ssenga yaleeteranga taata w'omuwala ebbaluwa evudde mu maka g'omulenzi esaba okwanjulwa mu maka gye bazaala omuwala era taata w'omuwala yagiddangamu ng'alaga olunaku n'essaawa omulenzi kwaliyanjulirwa.

Ku lunaku lw'okwanjula nga batwala ebita by'omwenge bisatu ekimu nga kye kiyitibwa ekiggulaluggi ekyaweebwanga taata azaala omuwala bwe wabeeranga nga tokirina ng'ovunaanibwa okusaalimbira mu maka ago saako n'okutanzibwa, ekita eky'okubiri kye kiyitibwa enjogeza era nga kino kyanywebwanga abantu ku njuyi zombi. Beeyanjula

okusobola okwemanya nokusaba okukkirizibwa okuzaalibwa mu maka omwo. Ekita ekyokusatu kye kiyitibwa ekyanjula era oluvannyuma lw'okukiwaayo awo nga bagabulwa olwendo lw'amazzi n'akattamukago. Awo omuko yawanga taata azaala omuwala ne mukoddomi we ekkanzu. Maama we ne Ssenga nga baweebwa ggomesi, ebirabo ebirala mwabangamu embuzi ey'omubibbo (ennyama yembuzi) n'embuzi ennamba eyaggyibwangawo amangu okwewala okukuukumula omusulo oba okusuula obusa awo ssaako okwewala abako okulaba ebitundu byayo ebyekyama.

Awo ekiba kisigalidde kwe kuwaayo omutwalo era guno gwabanga munnyo, omanyi ebiseera ebyo okufuna omunnyo ng'ositaana.

Ennaku zino bikyuse abazadde basaba engoye mpitirivu, waliwo gwe baasaba ggomesi kikumi (100) n'amakanzu kinaana (80) olaba n'abantu b'okukyalo bateekebwa ku lukalala lw'abanaafuna ebirabo! Abantu batuuse okwewala ensimbi mu banka oba mu bano ba mpolembuzi ndikuwa ente okusobola okugula ente, entebe, bodaboda, ttanka n'ebirala okusobola okweraga. Aboogezi nabo beefudde kirala, anti omukolo olutandika n'atandika okusala ag'enkolwa okusobola okukama abantu abazze ensimbi, ababuuza abataggwa ssaako n'okukyusa engoye ekiyitiridde. abayimbi, emikolo okuggwa ekiro byetamizza abantu omukolo guno.

Abooluganda tudde ku mukolo ogw'ennono, nazzikuno nga taata w'omuwala akala atya amaaso n'asaba okumuzimbira ennyumba, okuliisa abako abajja, okumugulira emmotoka, omugole okumaggulira amaaso mu kidaala?, Yalina nga kutunula ku nnyindo ye. Nga n'okuzira kizira n'okutta kitta okwenywegera mu kwanjula. Ssaako n'obako okuzina aga ffunduukululu mu maaso g'abakadde.

Bwewaba nga tewali atuloga ebintu ebimu tubivireko ddala okusobola okuzza Buganda ku ntikko.

Ebibuuzo:

- (a) Bintu ki omuwandiisi by'alaze nga bisaana kudibizibwa? *(obubonero 06)*
- (b) Nyonnyola emigaso gya Ssenga okusenziira ku kitundu ky'osomye. Leeta ebiri (2) *(obubonero 04)*
- (c) Lwaki omuwandiisi alaga nti omukolo gw'okwanjula tegusaana mu lujjudde? *(obubonero 02)*
- (d) Okwanjula okw'ennono kwabanga kutya okusenziira ku kitundu ekyo? *(obubonero 05)*
- (e) Ekitundu ky'osomye kiwe omutwe ogukituukirako obulungi. *(obubonero 02)*
- (f) Nyonnyola amakulu g'ebigambo bino nga bwe bikozezeddwa mu kitundu ekyo. *(obubonero 03)*
 - i) Mpola – embuzi ndikuwa ente
 - ii) Kattamukago
 - iii) Obuuma.

Okuva ku (g) – (i) wandiika ebyokuddamu mu bufunze ddala.

- (g) “Ebirabo ebyolusuluugi.” Omuwandiisi ateggeeza ki? *(akabonero 01)*
- (h) Lwaki Katikkiro Charles Peter Mayiga ayogeddwako mu kitundu kino? *(akabonero 01)*
- (i) Okugenda e Busoke kiraga nti, “Omwana omuwala.....” *(akabonero 01)*

EKITUNDU B

Kola 2(a) ne 2(b)

2. (a) Maririza engero zino nga bwezoogerebwa: (Obubonero 10)
- (i) Entamu ennyangu
 - (ii) Omuyonjo omutono
 - (iii) Lubaale maliba.....
 - (iv) Abasajja ssubi.....
 - (v) Ow'ensonyi.....
 - (vi) tassa mukono.
 - (vii) amuleka ku mmere nnuma.
 - (viii) tazibirirwa budde.
 - (ix) enkaajumbe temala nju.
 - (x) etuuka nnyinimu ku muze.
- (b) Nnyonnyola amakulu g'engeri zino agoomunda. (Obubonero 05)
- i) Omutamiiru tabaaga mbwa.
 - ii) Omwana gy'amannyi enkuba gyetonnya.
 - iii) Amaanyi tegawala luga.
 - iv) Ennyonnyo eteyise ekolerera makaayi.
 - v) Eyeewa ezomumba gwe bazikuba.

EKITUNDU C

Ddamu ebibuuzo bisatu (3) byokka mu kitundu kino, ng'obiggya mu butabo obwenjawulo nga akamu ku bwo ka bitontome. Toddamu kibuuza kisukka mu kimu ku buli katabo.

WAALABYEKI MAGOBA; Mbayiwa w'abato

Kola 3(a) oba 3(b)

3. (a) Soma ekitundu kino n'oluvannyuma oddemu ebibuuzo ku nkomerero yaakyo.
- Eby'eddiini si bye yali agenderako ennyo, naye ku mulundi guno yagenda okulaba nga tewali mulala yenna ayinza kumudduukirira mu kutya ne mu kweraliikirira bye yalimu wazira Katonda. Kye yava akyamako.....gye yayitangako bulijjo ng'agenda ku mulimu. Kyazira kuyingira bwati n'awulira eddembe ery'enjawulo mu mutima gwe. Awo natandika okusaba Katonda amuyambe.

Ebibuuzo:

- (i) Ebigambo ebyo bisimbuddwa mu ssuula ki ey'olugero? (obubonero 02)
- (ii) Ayogerwako akyama wa? Era ayagala Katonda amuyambe mu ki? (obubonero 04)
- (iii) Nyonnyola ensonga musanvu (7) ezireeseewo okweraliikirira n'okutya mu bulamu bw'ayogerwako atuuke n'okusaba Katonda amuyambe. (obubonero 14)

oba

- (b) Omuwandiisi w'olugero Mbayiwa atukyayisa atya embeera z'ekibuga? Nyonnyola, ensonga kkumi (10) engeri gye kiragiddwa. (obubonero 20)

RUTH .N. KABOGGOZA: Amaggwa n'emitego mu buvubuka.

Kola 3(a) oba 3(b)

- (a) Soma ekitundu kino n'oluvannyuma oddemu ebibuuzo ku nkomerero yaakyo.
- "Omulenzi yatya n'alowooza bw'anaabitebya nga omuwala amufiiriddeko mu nju nga tabiraba, omulenzi bw'aba anyumya agamba nti "Bannange amaziga g'ekisajja gava wala naye ku olwo nakaaba n'entuuyana ne nkamala.....ne nneekola n'ekyokuganza obwana obusoma"

Ebibuuzo:

- (i) Mulenzi ki ayogerwako mu kitundu ekyo? (obubonero 02)
- (ii) Kiki ekyali kiguddewo ekimuleetera okutuuyana. (obubonero 02)
- (iii) Ruth Kaboggoza alaze atya nti abalenzi be baviirako ebizibu ebituuka ku baana abawala mu lugero. Leeta ensonga munaana (8) ezooлека kino. (obubonero 16)

oba

- (b) Ssomo ki ly'ofuna okuva mu kubuulirirwa kwa Cissy okuva mu buto bwe? (obubonero 20)

NAKITTO PRISCA: Nze mbimaze

Kola 5(a) oba 5(b)

5. (a) Soma ekitundu kino n'oluvannyuma oddemu ebibuuzo ku nkomerero yaakyo.
- "..... Sha nga nzira ku mbwa okwekerebenda nayo mbunno olw'okuva ku buko? Ha Maama Katonda yeebale obutantondera mu mulembe ogwo ogwedda saandisobodde. Bambi abakazi nga baabonaabona nnyo! Weebale emboozzi yo nnungi naye sikyegomba kuzaalibwa mu mirembe egyo eggyedda. Naye omulembe guno abaana abalenzi nga beesiimye. Singa nno nnazaalibwa nga ndi mulenzi....."

Ebibuuzo:

- (i) Ani ayogera ebigambo ebyo era abigamba ani? (obubonero 02)
- (ii) Ebigambo ebyo bisimbuddwa mu kitundu ki eky'omuzannyo? (obubonero 02)
- (iii) Omwogezi asinziira ku ki okwegomba okuzaalibwa nga mulenzi? Leeta ensonga munaana (8). (obubonero 16)

Oba

- (b) Laga engeri omuwandiisi gy'atuzimbiddemu omulembe ogwedda n'omulembe ogwa leero mu muzannyo Nze Mbimaze . (obubonero 20)

SSALI DAMASCUS: Obuwoomi bw'Ekitontome

Ddamu nnamba 6(a) oba 6(b)

6. (a) Ssali Damascus tosobola kumwawukanya ku buwangwa bwa nsi ye. Kino kyeyolese kitya mu bitontome Obuwoomi bw'Ekitontome.

Oba

Bikkula

- (b) Soma ekitontome kino n'oluvannyuma oddemu ebibuuzo ku nkomerero yaakyo.

EKIJJOMANYI

Abaatuzaala be bagamba,
N'abaatukuza ne bassa okwo,
Ne bagerenjula ez'e Gganda,
Nga batunuulira eby' Abedda,
Nti bwokula ogira n'ogejja,
Naye olumangako ku ggumba.

Saamanya bifa wa jjajja,
Oli eyasenguka e Bwebajja,
Eyagenda ne Nankanja,
Bamale balime eri e Kkojja,
Gye baakozanga ku kyennyanya,
Ekyabasuubulwa e Bwebajja.

Bwe bwaziba ekiro mu ttumbi.
Ababbi ne banoonya ensimbi.
Abandi ne bakwata enkumbi,
Bajaasi ne bava mu nkambi,
Balwanyise agasajja agabbi,
Agaali gayasa n'ensumbi.

Abantu baakubanga amalebe,
Abandi ne bakoona ebikebe,
Batere bakange omulabe,
Ne wabula abataasa omugabe,
Beezizibye bakutte obutebe,
Mbu batere bakange omulabe.

Nadduka nzira mu kisambu.
Ne mwannyinaze Nansambu,
Tugubagguba mu mbubbu,
Tuyolekera e Lwannumbu,
Gye baatusenza mu lwetumbu,
Bwe ntyo ne mponya Nansambu.

Ebibuuzo:

- (i) Omuwandiisi azimbye atya sitanza mu kitontome kino. (obubonero 05)
- (ii) Laga ebintu ebyeyambisiddwa okuzimba entunnunsi mu kitontome kino. (obubonero 05)
- (iii) Obuyiia bw'omuwandiisi w'ekitontome kino obwesigamya ku bintu ki? (obubonero 07)
- (iv) Nyonyola amakulu ga Vvaasi zino wammanga. (obubonero 03)
- (a) Beezizibye bakutte obutebe.
- (b) Twagubagguba mu mbubbu.
- (c) Ne bagerenjula ez'e Gganda.

NAMAGANDA ALICE: Ebitontome Ebiseeneekerevu

Kola 7(a) oba 7(b)

- (a) Bw'osoma ebitontome ebiseeneekerevu otegeera mangu nti Namaganda ategeera bulungi ebizibu ebiruma abantu be. Kozesa ebitontome ebyenjawulo okukakasa ensonga eyo. (obubonero 20)

Oba

- (b) Soma ekitontome kino n'oluvannyuma oddemu ebibuuzo ku nkomerero yaakyo.

TULABYE N'ABANYUUNYUNSI

Ebiremesa enkulaakulana
Z'entalo ezitagga wano
Tuli bankuseere nnyo
Ntandikwa nzibu nnyo wano
Baatunyagako ebyaffe
Batunyagako ebyaffe
Twafune mbu bwetwaze
Byonna byoya bya nswa sso
Tuliko abanyuunyinsi!

Okusuubula okuliwo
Batutwalako ppamba
Mmwanyi ne baziggya wano
Ebikomo ne zzabu
Emmere bagiggya wano
bibala babiggya wano
Ennyama bagiggya wano
Batufootola ebbeyi
Tulabye n'abanyuunyinsi

Twafugibwa n'obudde
Baatusuuzi n'ebyaffe
Tukoppererera bya mweru
Bo ne bafuna ssente

Endwadde zituguuya wano
Ate batuguza mmundu
Twetugumbule entakera
Ne batuwola ssente
Tweddaabirize mbu nno
Tulabye nabanyuunyinsi

Enjawukana ezaffe
Ezimu ziva ku ddiini
Ebibu biba byabufuzi
Twesanjagisa mbazzi
Enfuga etetuuse nnyo
Abaluvu b'ensimbi
Be balabe b'ensi eno
Tulabye n'abanyuunyinsi

Bwe batuwola ssente
Ate n'obukwakkulizo
Ne bakuguza essaawa
So nga oyagala nkumbi
Ensomesa y'omweru
Ekonyeza ddala ensi eno
Emirimu gy'emikono
Obutale bw'omweru
Birimu amakoona sso
Tulabye n'abanyuunyinsi

Nneekubagizaamu biki?
Kizibu kinaggwaawo?
Oba lwe banaavulira?
Kye kiseera twegatte
Okugaziya obutale
Enfuga etereere wano
Tekinologiya aleetwe
Tweggyeko abanyuunyinsi.

Ebibuuzo:

- (i) Omwogezi mu kitontome kino akiikiridde bantu ba ngeri ki?
(obubonero 02)
- (ii) Lwaki omutontomi yeeyambisizza obubonero bw'empandiika mu
kitontome kino?
(obubonero 04)
- (iii) Ekitontome kino kitegekeddwa kitya kiryoke kibalibwe nga ekitontome.
(obubonero 12)
- (iv) Nnyonnyola amakulu g'ennyiriri zino zombi.
(obubonero 02)

BIKOMYE WANO